



01
18056

Komisija za izradu Prijedloga Odluke

Ilidža, 31.07.2019.godine

31-07-2019
MATERIJAL
ZA 21. REDOVNU
SJEDNICU
[Signature]

**OPĆINA ILIDŽA
OPĆINSKO VIJEĆE**

PREDMET: Prijedlog Odluka o uslovima i načinu držanja kućnih ljubimaca
na području Općine Ilidža

Na osnovu Programa rada Općinskog vijeća Ilidža za 2019. godinu usvojenog na 21. redovnoj sjednici održanoj dana 31.12.2018. godine, dostavljamo Vam materijal za avgustovsku sjednicu Općinskog vijeća kao prijedlog:

1. Odluka o uslovima i načinu držanja kućnih ljubimaca, pasa i domaćih mački, načinu postupanja s napuštenim i izgubljenim životinjama na području Općine Ilidža.

Navedeni materijal Vam dostavljamo u pisanoj formi i CD elektronskoj verziji.

S poštovanjem!

PRILOG: kao u tekstu

DOSTAVLJENO:
1x Naslovu
1x a/a



Predsjednik komisije za izradu Prijedloga Odluke

[Signature]
Enes Corbo



BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO - OPĆINA ILIDŽA



BOSNIA AND HERZEGOVINA
FEDERATION OF BOSNIA AND HERZEGOVINA
SARAJEVO CANTON - MUNICIPALITY OF ILIDŽA

OPĆINSKI NAČELNIK

MUNICIPALITY MAYOR

PRIJEDLOG:

ODLUKA

O USLOVIMA I NAČINU DRŽANJA KUĆNIH LJUBIMACA, PASA I DOMAĆIH MAČKI,
NAČINU POSTUPANJA S NAPUŠTENIM I IZGUBLJENIM ŽIVOTINJAMA NA
PODRUČJU OPĆINE ILIDŽA

Ilidža, juli 2019.godina

PREDLAGAČ
OPĆINSKI NAČELNIK

Prof.dr. Senaid Memić

Komisija za izradu Prijedloga Odluke



Butmirska cesta br. 12. Sarajevo, BiH, tel. +387 33 775-700 i 775-600
www.opcinailidza.ba, E-mail: opcinski.nacelnik@opcinailidza.ba



Na osnovu člana 8. stav 3. alineja 31. i 37. Zakona o principima lokalne samouprave („Službene novine Federacije BiH“, broj 49/06 i 51/09), člana 28. stav 1. tačka 2. i člana 87. Statuta Općine Ilidža –prečišćeni tekst („Službene novine Kantona Sarajevo“, broj 33/10 i 18/16), a u vezi sa Zakonom o zaštiti i dobrobiti životinja (Službeni glasnik BiH broj 25/09), Pravilnikom o držanju opasnih životinja („Službeni glasnik BiH“, broj 27/10), Pravilnikom o identifikaciji i vođenju evidencije pasa, mačaka i pitomih vretica u Bosni i Hercegovini („Službeni glasnik BiH“, broj 96/16), Zakonom o veterinarstvu Federacije BiH („Službene novine Federacije BiH“, broj 46/00), Zakonom o komunalnim djelatnostima („Službene novine Kantona Sarajevo“, broj 14/16, 43/16, 10/17, 19/17 i 20/18), Zakonom o prekršajima protiv javnog reda i mira („Službene novine Kantona Sarajevo“, broj 18/07 i 7/08), Općinsko vijeće Ilidža je, na _____redovnoj sjednici održanoj dana _____godine, donijelo

O D L U K U

o uslovima i načinu držanja kućnih ljubimaca, pasa i domaćih mački, načinu postupanja s napuštenim i izgubljenim životinjama na području općine Ilidža

I OPĆE ODREDBE

Član 1. (Predmet Odluke)

Ovom Odlukom se uređuju minimalni uslovi i način držanja kućnih ljubimaca, registracija, uslovi kretanja koje im njihovi imaoci moraju osigurati, način kontrole njihovog razmnožavanja te način postupanja s napuštenim i izgubljenim životinjama na području općine Ilidža.

Član 2. (Pojmovi)

Pojedini pojmovi u ovoj Odluci imaju sljedeće značenje:

- a) kućni ljubimci su: psi, domaće mačke, domaće ptice, mali glodari, terarijske, akvarijske i druge životinje koje se uzgajaju i drže za društvo, rekreaciju, zaštitu ili pomoć čovjeku;
- b) izgubljena životinja je životinja koja je odlutala od vlasnika i on je traži;
- c) napuštena životinja je životinja koju je vlasnik svjesno napustio ili zbog više sile kao što su bolest, smrt ili gubitak slobode;
- d) opasne životinje su životinje koje pokazuju napadačko ponašanje prema čovjeku i mogu ugroziti zdravlje i sigurnost ljudi i životinja;
- e) imalac životinje odnosno kućnog ljubimca (u daljnjem tekstu: imalac) je svaka pravna ili fizička osoba koja je kao vlasnik, odgovorno ili zaduženo lice za životinju dužno da se brine o njenom zdravlju i dobrobit životinje;
- f) pas lualica je svaki pas koji nema vlasnika, koji nije pod kontrolom vlasnika ili ga vlasnik ne sprečava u lutanju, što uključuje napuštene i izgubljene pse;
- g) radne životinje su psi koji služe kao tjelesni čuvari i čuvari imovine, psi vodiči slijepih i oni koji služe za pomoć, psi tragači i psi koji služe za obavljanje drugih poslova;
- h) sklonište za životinje (u daljnjem tekstu: sklonište) je objekt u kojem se smještaju i zbrinjavaju napuštene i izgubljene životinje gdje im se osigurava potrebna pomoć;
- i) higijenski servis je služba za prikupljanje napuštenih, izgubljenih i životinja bez vlasnika-lualice, i predaje ih u sklonište za životinje;



- j) sužbene životinje su životinje koje imaju licencu za rad i služe za obavljanje poslova pojedinih državnih tijela.
- k) Veterinarske organizacije u skladu sa Zakonom o veterinarstvu Federacije BiH (Službene novine Federacije BiH broj 46/00) su: veterinarske stanice, veterinarske klinike, apoteke kao i samostalna veterinarska praksa;
- l) Javne površine su: pješačke saobraćajnice i trotoari, javne zelene površine (parkovi, travnjaci, zelenilo uz saobraćajnice) i sportsko-rekreativne površine (izletišta, šetališta i sl.).

II USLOVI I NAČIN DRŽANJA KUĆNIH LJUBIMACA

Član 3.

(Dužnosti i zabrane za imaoce kućnih ljubimaca)

(1) Imalac kućnih ljubimaca dužan je kućnog ljubimca :

- a) držati u skladu s njihovim potrebama, a minimalno predviđenim Zakonom o zaštiti i dobrobiti životinja i ovom Odlukom;
- b) smjestiti u dovoljno prostora i osigurati im odgovarajuće uslove kretanja, ako su vezani i zatvoreni, koji odgovara njihovoj veličini i zaštiti od vremenskih neprilika i drugih nepovoljnih uticaja za njihov život;
- c) redovno i pravilno hraniti te trajno omogućiti pristup svježoj pitkoj vodi;
- d) označiti psa mikročipom i vakcinisati protiv bjesnila u skladu sa Zakonom o veterinarstvu F BiH;
- e) onemogućiti bijeg i kretanje po javnim površinama bez nadzora;
- f) na vidljivom mjestu staviti oznaku koja upozorava na psa, te imati ispravno zvono na ulaznim dvorišnim ili vrtnim vratima;
- g) pravovremeno zatražiti veterinarsku pomoć te osigurati zbrinjavanje i odgovarajuću njegu bolesnih i ozlijeđenih životinja;
- h) održavati čistim prostor u kojem borave.

(2) Imaocu kućnih ljubimaca zabranjeno je:

- a) zanemarivanje kućnih ljubimaca u smislu njihovog zdravlja, smještaja, ishrane i njege;
- b) ograničavanje kretanje kućnim ljubimcima koje mu uzrokuje bol, patnju, ozljede ili strah;
- c) bacanje petardi ili drugih pirotehničkih sredstava na životinje;
- d) trčanje kućnih ljubimaca privezanih uz motorno prijevozno sredstvo u pokretu;
- e) držati pse trajno vezane ili ih trajno držati u prostorima ili dijelu dvorišta bez omogućavanja slobodnog kretanja izvan tog prostora;
- f) vezati pse, osim privremeno u iznimnim situacijama kada ograđivanje dijela dvorišta nije izvodivo. U tom slučaju pas se može vezati na način da mu je omogućeno kretanje u promjeru 5 /pet/ metara, a sredstvo vezanja i ogrlica moraju biti od takvog materijala da psu ne nanose bol ili ozljede;
- g) držanje kućnih ljubimaca na adresi različitoj od prebivališta ili boravišta imaoaca , osim u slučaju kada se radi o radnim psima koji čuvaju neki objekt ili imovinu, a imalac im je dužan osigurati svakodnevni nadzor;
- h) držati kao kućne ljubimce opasne i potencijalno opasne životinjske vrste bez odobrenja nadležne institucije;



- i) postupati u suprotnosti sa zabranama iz člana 4. Zakona o zaštiti dobrobiti životinja („Službeni glasnik BiH“, broj 25/09), životinju bez opravdanog razloga ubiti, nanositi joj bol, patnju i štetu, mučiti je i namjerno je izlagati stresu i strahu.

III USLOVI DRŽANJA KUĆNIH LJUBIMACA U STAMBENIM ZGRADAMA I PORODIČNIM KUĆAMA

Član 4.

(Držanje pasa i mački u stanu, porodičnoj kući, vrtu)

- (1) U objektima i zgradama kolektivnog stanovanja u stanu dozvoljeno je držati jednog psa i dvije mačke.
(2) U porodičnoj kući, vrtu ili sličnom zemljištu dozvoljeno je držati dva psa najviše tri ukoliko se radi o autohtonoj vrsti psa i tri mačke.

Član 5.

(Održavanje čistoće)

Imalac kućnih ljubimaca dužan je brinuti o čistoći zajedničkih prostorija u kojim se kreću kućni ljubimci, te odmah očistiti ili oprati površinu, ukoliko je njegov ljubimac na bilo koji način onečistio (hodnici, stepeništa, terase, liftovi, balkoni, podrumski i tavanski prostor).

Član 6.

(Obezbjedivanje nadzora kućnog ljubimca)

- (1) U objektima i zgradama kolektivnog stanovanja, zabranjeno je držanje pasa i mačaka i ostavljanje istih bez nadzora imaoca na balkonu, terasi i liftu koja pripada stanu. U slučaju odsutnosti, imalac je dužan osigurati nadzor i brigu punoljetne osobe za svog kućnog ljubimca u skladu sa njegovim potrebama.
(2) Imalac koji psa drži u stanu ili kući bez okućnice, dužan ga je svakodnevno izvoditi radi obavljanja nužde i zadovoljenja dnevnih fizičkih aktivnosti.

Član 7.

(Kretanje u liftu, stubištu hodnika)

- (1) Uvođenje psa ili mačke u lift stambene zgrade, dozvoljeno je samo ako je lift prazan.
(2) Prilikom korištenja lifta, stepeništa i hodnika stambene zgrade, pas mora biti na povodcu pod neposrednom kontrolom imaoca psa.
(3) Psi visoke i srednje pasmine moraju biti sa brnjicom.

Član 8.

(Remećenje javnog reda i mira)

Imalac psa koji učestalim i dugotrajnim lajanjem, zavijanjem ili grebanjem remeti mir dužan je odmah preduzeti odgovarajuće mjere kako bi spriječio daljnje uznemiravanje ili ukloniti psa, u skladu sa odredbama Zakona o prekršajima protiv javnog reda i mira, a koji se odnosi na stav o proizvođenju neadekvatne buke.



Član 9.

(Saglasnost suvlasnika za držanje psa u ograđenom prostoru)

(1) Psi se mogu držati u dvorištu porodične kuće, zajedničkom dvorištu porodične kuće u dvorištu sa većim brojem porodičnih kuća u posebnom objektu, po prethodno pribavljenoj saglasnosti svih suvlasnika porodične kuće, odnosno saglasnosti svih vlasnika porodičnih kuća.

(2) Ukoliko se pas drži u ograđenom prostoru ili u kućici za psa, smještaj kućice ili ograđenog prostora treba biti takav da ne ugrožava/ometa stanovanje u susjednom dvorištu.

(3) Objekat za držanje psa iz prethodnog stava ovog člana, mora biti udaljen najmanje 5 (pet) metara od najbliže stambene zgrade ili poslovnog objekta na susjednoj parceli, odnosno da ne ugrožava/ometa stanovanje u susjednom dvorištu.

Član 10.

(Držanje psa u ograđenom i neograđenom dvorištu)

(1) Pas koji se drži u ograđenom dvorištu ili drugom zemljištu ne mora biti vezan ukoliko ograda svojom visinom i čvrstoćom osigurava sigurnost prolaznika i susjeda. Ulazna kapija dvorišta individualnog stambenog objekta, u kome se drži pas, mora biti vidno označena tablom sa crtežom i natpisom koji ukazuje na prisustvo psa i mora imati ispravno zvono na ulaznim dvorišnim ili vrtnim vratima.

(2) Pas koji se drži u neograđenom dvorištu, mora biti sigurno vezan, na način da ne ometa kretanje i sigurnost građana i mora biti smješten u boks koji će osigurati da se pas neće moći samostalno udaljiti.

Član 11.

(Nemogućnost daljnje brige o kućnom ljubimcu)

(1) Imalac kućnog ljubimca, koji se o njemu ne može više brinuti u skladu sa obavezama iz člana 3. ove Odluke, dužan je pronaći udomitelja; udruženje ili osobu koja će o njemu brinuti na propisan način ili ga predati u sklonište za životinje, koga u skladu sa Zakonom osnuje fizička ili pravna osoba, te je dužan snositi troškove boravka do udomljenja ili drugog načina zbrinjavanja životinje.

(2) Udomitelj može biti punoljetno lice, kao dokaz mora priložiti ličnu kartu i potpisanu izjavu kojom preuzima obaveze prema životinji.

(3) Udomljavati se mogu životinje prema propisanim kriterijima i uz prethodno provedene mjere nadležne veterinarske organizacije.

(4) Zabranjuje se eutanazija zdravih životinja.

IV USLOVI IZVOĐENJA KUĆNIH LJUBIMACA NA JAVNE POVRŠINE

Član 12.

(Izvođenje na javnu površinu)

(1) Psi se smiju izvoditi na javne površine iz člana 2. tačka (I) ove odluke, na povodcu i pod nadzorom imalaca.

(2) Imalac kućnog ljubimca dužan je tokom njegovog izvođenja na javnu površinu sa sobom imati propisanu službenu ispravu kao dokaz o njegovoj registraciji i vakcinaciji.



Član 13.
(Ograničenja kretanja po javnim površinama)

(1) Kućnim ljubimcima zabranjeno je kretanje na dječijim igralištima, parkovima, cvjetnjacima, neograđenim sportskim terenima, dvorištima škola i vrtića te na drugim mjestima gdje postoji opasnost ugružavanja zdravstveno-higijenske sigurnosti i zdravlja ljudi bez dopuštenja vlasnika i dozvole korisnika prostora.

(2) Upravitelj javnih površina i ustnova dužni su istaknuti znak zabrane pristupa kućnim ljubimcima.

Član 14.
(Zabrana samostalnog kretanja po javnim površinama)

Iz razloga sigurnosti saobraćaja, građana i drugih životinja te u svrhu prevencije nekontroliranog razmnožavanja, zabranjeno je puštanje kućnih ljubimaca da samostalno hodaju javnim površinama bez prisutnosti i nadzora imaoca.

Član 15.
(Obaveza čišćenja javne površine)

Pri izvođenju kućnog ljubimca na javnu površinu imalac je dužan nositi pribor za čišćenje i očistiti javnu površinu koju njegov kućni ljubimac onečisti.

Član 16.
(Kućni ljubimci u sredstvima javnog prijevoza)

Kućni ljubimci se mogu uvoditi u sredstvo javnog prijevoza samo po utvrđenim pravilima prijevoznika.

Član 17.
(Izuzeci od ove Odluke)

Ograničenje kretanja kućnih ljubimaca iz ove Odluke ne primjenjuje se na pse osposobljene za pomoć osobama s invaliditetom.

V REGISTRACIJA KUĆNIH LJUBIMACA

Član 18.
(Registracija)

(1) Registracija u smislu ovog člana, podrazumijeva obavezno označavanje mikročipom, upis u propisane evidencije, registar, izdavanje službene isprave o upisu, identifikaciji i registraciji pasa, vlasništvu te obaveznim mjerama zaštite zdravlja u skladu sa posebnim propisima.

(2) Stručna služba za koordinaciju rada mjesnih zajednica će u saradnji sa KJP „Veterinarska stanica“ Sarajevo učestvovati u aktivnostima na registraciji pasa u skladu sa stavom (1) ovog člana.

(3) Troškove upisa obaveznog označavanja i izdavanja službenih isprava snosi vlasnik.



Član 19.
(Obaveza registracije)

- (1) Imalac kućnog ljubimca je dužan registrirati životinju u roku od 7 (sedam) dana od dana prvog sticanja vlasništva u veterinarskoj organizaciji koja vodi registar životinja.
- (2) Imalac kućnog ljubimca je dužan u roku od 7 (sedam) dana prijaviti otuđenje, uginuće u cilju utvrđivanja nestanka i smrti kućnog ljubimca, kao i svaku drugu promjenu o statusu životinje, rođenje (leglo), nadležnoj veterinarskoj organizaciji koja vodi Registar kućnih ljubimaca.
- (3) Kućni ljubimci koji ne mjenjaju vlasnika obavezno se identikuju nakon navršena tri mjeseca starosti, a najkasnije prilikom prvog cijepljenja protiv bjesnila.
- (4) Registraciju cijepljenja vrši nadležna veterinarska organizacija.
- (5) Imalac psa je dužan označiti psa markicom koju je dobio prilikom registracije.
- (6) Imalac psa dužan je nadležnoj veterinarskoj organizaciji koja vodi upisnik (registar) pasa prijaviti uginuće psa radi utvrđivanja uzroka uginuća i ažuriranje baze podataka o registraciji životinja.

VI POSTUPANJE SA OPASNIM PSIMA

Član 20.
(Dužnosti imaoca opasnog psa)

Imalac opasnog psa je dužan:

- a) provesti sve zaštitne mjere koje su propisane,
- b) psa držati u zatvorenom prostoru iz kojeg ne može pobjeći, a vrata u prostoru u kojem se nalazi takav pas moraju biti zaključana,
- c) na ulazu u prostor u kojem se nalazi opasan pas mora biti vidljivo istaknuto upozorenje: »OPASAN PAS«.

Član 21.
(Postupanje sa opasnim psima)

Izvođenje opasnih pasa na javne površine dopušteno je isključivo sa brnjicom i na povodcu od strane imaoca.

Član 22.
(Ovlaštenja komunalnog redara)

- (1) Pri sumnji da se radi o opasnom psu, komunalni redar je ovlašten zatražiti na uvid od imaoca potvrdu kojom se potvrđuje da su nad psom provedene sve propisane mjere.
- (2) Ukoliko imalac ne pokaže potrebnu dokumentaciju, komunalni redar sastavlja službeni zapisnik te obavještava nadležnu veterinarsku inspekciju za daljnje postupanje.



VII NAČIN KONTROLE RAZMNOŽAVANJA KUĆNIH LJUBIMACA

Član 23. (Kontrola razmnožavanja)

Imalac je dužan držati pod kontrolom razmnožavanje kućnih ljubimaca i spriječiti svako neplanirano razmnožavanje.

Član 24. (Načini provođenja kontrole razmnožavanja)

- (1) Kontrola razmnožavanja pasa i mačaka provodi se trajnom sterilizacijom, kontrolom kretanja u vrijeme tjeranja ženki i upotrebom veterinarskih sredstava.
- (2) Ove poslove obavlja stručno lice iz nadležne veterinarske organizacije.

VIII NAČIN POSTUPANJA S IZGUBLJENIM I NAPUŠTENIM ŽIVOTINJAMA

Član 25. (Postupanje s izgubljenim životinjama)

- (1) Imalac kućnog ljubimca dužan je u roku od 3 (tri) dana od dana gubitka prijaviti njegov nestanak skloništu za životinje, a u roku od 7 (sedam) dana veterinarskoj stanici koja je ovlaštena za vođenje Evidencije registrovanih kućnih ljubimaca.
- (2) Ako u roku od 14 (četnaest) dana od dana objave podataka imalac nije dostavio zahtjev za vraćanje životinje, sklonište postaje vlasnik životinje te je može udomiti.
- (3) Imalac izgubljene životinje dužan je nadoknaditi sve troškove kao i svaku štetu koju počinu životinja od trenutka nestanka do trenutka vraćanja imaocu.

Član 26. (Nalazak napuštene ili izgubljene životinje)

- (1) Nalazač napuštene ili izgubljene životinje mora u roku od 3 (tri) dana od nalaska životinje obavijestiti sklonište za napuštene životinje, ukoliko životinju nije vratio imaocu.
- (2) Nalazač napuštene ili izgubljene životinje mora pružiti životinji odgovarajuću zaštitu do vraćanja imaocu ili do smještaja u sklonište za napuštene životinje.
- (3) Životinja se ne smješta u sklonište ako se može utvrditi njen vlasnik, osim ako vlasnik odmah ne može doći po životinju.

IX ZAŠTITA ŽIVOTINJA

Član 27. (Obaveza pružanja pomoći životinji)

- (1) Ko ozlijedi ili primijeti ozlijeđenu ili bolesnu životinju mora joj pružiti potrebnu pomoć, a ako to nije u mogućnosti sam učiniti, mora joj osigurati pružanje pomoći.



(2) Ako nije moguće utvrditi ko je imalac životinje, pružanje potrebne pomoći ozlijeđenim i bolesnim životinjama zatečenim na području Općine obavlja veterinarska stanica o trošku Ministarstva privrede Kantona Sarajeva.

(3) Ako se utvrdi imalac ozlijeđene ili bolesne životinje, sam snosi troškove.

X NADZOR

Član 28.

(Nadzor nad provođenjem Odluke)

(1) Nadzor nad provođenjem odredbi ove Odluke vrše nadležni organi, svako iz svoga djelokruga rada; komunalni redar i komunalni inspektor općine Ilidža, u saradnji sa komunalnim inspektorom Kantona Sarajeva, veterinarska inspekcija Kantona Sarajeva, kao i pripadnici MUP-a Kantona Sarajeva, V Policijska uprava Ilidža, (ovlaštena lica).

(2) Ovlaštena lica iz stava 1. ovog člana postupaju po službenoj dužnosti kada uoče postupanje protivno Odluci, te prema prijavi fizičkih ili pravnih osoba.

(3) Komunalni redar i komunalni inspektor općine Ilidža u saradnji sa kantonalnim komunalnim inspektorom vrše nadzor nad provođenjem odredbi članova 3. 4. 5. 6. 7. 9. 10. 12. 13. 14. 15. 20. 22. i 28. ove Odluke.

(4) Veterinarski inspektor Kantona Sarajeva će vršiti nadzor nad provođenjem odredbi članova 3. 11. 18. 19. 20. 22. 23. 24. 26. 27. i 28. ove Odluke.

(5) Ako se u vršenju Inspekcjskog nadzora onemogućiti nadležnom inspektoru obavljanje pregleda pružanjem fizičkog otpora ili ako se takav otpor osnovano očekuje, inspektor može tražiti pomoć/asistenciju nadležnog organa policije.

(6) Pripadnici MUP-a Kantona Sarajeva, V Policijska Uprava Ilidža, u skladu sa svojim ovlaštenjima i nadležnostima propisanim Zakonom o prekršajima protiv javnog reda i mira ("Službene novine Kantona Sarajeva" broj 18/07 i 7/08), vrši nadzor nad provođenjem odredbi članova 6. 8. 20. 21. i 22. ove Odluke.

Član 29.

(Prava i obaveze ovlaštenih lica)

Prilikom vršenja nadzora nad poštivanjem odredbi ove Odluke, ovlaštena lica imaju slijedeća prava i obaveze:

- a) da naredbe izvršenje obaveza utvrđenih ovom Odlukom i preduzimanju preventivne, korektivne i represivne mjere i radnje izdavanjem usmenih ili pisanih naređenja ili upozorenja na licu mjesta ili naknadno po saznanju za počinjenu nepravilnost ili prekršaj,
- b) da donose rješenja u pisanoj formi radi otklanjanja nepravilnosti u skladu sa Zakonom o organizaciji organa uprave u Federaciji BiH i Zakonom o upravnom postupku,
- c) na licu mjesta izreknu novčanu kaznu prekršajnim nalogom,
- d) podnesu zahtjev za pokretanje prekršajnog postupka,
- e) podnesu krivičnu prijavu, ukoliko je određeno postupanje predviđeno kao krivično djelo posebnim zakonom.



XI NOVČANE KAZNE

Član 30

(1) Novčanom kaznom od 30,00 – 1.000,00 KM kaznit će imalac kućnih ljubimaca – fizičko lice 200,00 – 1.500,00 KM kaznit će se imalac – pravno lice ako postupi suprotno članu 19. i 20. Odluke:

- a) Ne registruje životinju u roku od 7 (sedam) dana od dana prvog sticanja vlasništva u veterinarskoj organizaciji koja vodi registar životinja
- b) U roku od 7 (sedam) dana ne prijavi otuđenje, uginuće u cilju utvrđivanja nestanka i smrti kućnog ljubimca, kao i svaku drugu promjenu o statusu životinje, rođenje (leglo), nadležnoj veterinarskoj organizaciji koja vodi registar kućnih ljubimaca
- c) Kućnog ljubimca koji ne mjenjaju vlasnike ne identifikuje nakon navršena tri mjeseca starosti, a najkasnije prilikom prvog cijepjenja protiv bjesnila
- d) Ne označi psa markicom koju je dobio prilikom registracije
- e) Ne prijavi nadležnoj veterinarskoj organizaciji koja vodi upisnik (registar) pasa uginuće psa radi utvrđivanja uzroka uginuća i ažuriranje baze podataka o registraciji životinja
- f) Imalac opasnog psa ne provede propisane zaštitne mjere
- g) Opasnog psa ne drži u zatvorenom prostoru
- h) Na ulazu u prostor u kojem se nalazi opasan pas nije istaknuto upozornje "OPASAN PAS"

(2) Novčanom kaznom od 30,00 – 500,00 KM kaznit će se imalac kućnih ljubimaca, ako:

- a) Ne ispunjava dužnosti i obaveze prema kućnom ljubimcu iz /član 3. /
- b) Ako drži veći broj pasa i mačaka od propisanog u stambenim zgradama, porodičnim kućama (član 4./
- c) Ne brine o čistoći zajedničkih prostorija u kojima se kreću kućni ljubimci i ne očisti odmah površinu koju je njegov ljubimac onečistio /član 5./
- d) Ne obezbijedi nadzor nad kućnim ljubimcem na balkonu, stepeništu, terasi i liftu u slučaju odsutnosti imaoaca
- e) Ne izvodi svakodnevno psa kojeg drži u stanju ili kući bez okućnice radi obavljanja nužde i zadovoljenja dnevnih fizičkih aktivnosti /član 6./
- f) Uvodi psa i mačku u lift koji nije prazan
- g) Pri korištenju lifta stepeništa i hodnika stambene zgrade pas nije na povodcu
- h) Pas visoke i srednje pasmine nema brnjicu /član 7./
- i) Nije poduzeo mjere za sprječavanje remećenja javnog reda i mira /član 8./
- j) Drži psa bez saglasnosti suvlasnika /član 9./
- k) Drži psa u ograđenom i neograđenom prostoru /član 10./
- l) Ne ispunjava obaveze u slučaju da se više ne može brinuti o kućnom ljubimcu /član 11./
- lj) Izvodi opasnog psa na javnu površinu bez brnjice bez povodca /član 21./
- m) Ne pokaže komunalnom redaru potrebnu dokumentaciju /član 22./
- n) Ne drži pod kontrolom razmnožavanje kućnih ljubimaca /član 23./
- nj) Ne postupa sa izgubljenom životinjom /član 25./
- o) Nalazač napuštene i izgubljene životinje ne postupi /član 26./
- p) Ne pruži pomoć i zaštitu životinja /član 27./

(3) Novčanom kaznom od 30,00 – 500,00 KM kaznit će se imalac kućnih ljubimaca ako pri izvođenju kućnih ljubimaca na javne površine postupi suprotno odredbama člana: 12., 13., 14. i 15. ove Odluke



XII PRIJELAZNE I ZAVRŠNE ODREDBE

Član 31. (Upoznavanje sa Odlukom)

Svi imaoi kućnih ljubimaca na području Općine Ilidža biće upoznati sa odredbama ove Odluke putem web-stranice Općine Ilidža, putem mjesnih zajednica (oglasnih tabli, članova Savjeta i Sekretara mjesnih zajednica) i putem predstavnika etažnih vlasnika u zgradama kolektivnog stanovanja.

Imaoi kućnih ljubimaca, dužni su njihovo držanje uskladiti sa odredbama ove Odluke u roku od jedne godine od dana stupanja na snagu ove Odluke.

Član 32. (Stupanje na snagu)

Ova Odluka stupa na snagu osmog dana od dana objavljivanja u Službenim novinama Kantona Sarajevo.

Ilidža, _____2019.godine

PRESJEDAVALAČI

Muhamed Omerović



OBRAZLOŽENJE

I PRAVNI OSNOV

Pravni osnov za donošenje Odluke o uslovima i načinu držanja kućnih ljubimaca, pasa i domaćih mački, načinu postupanja s napuštenim i izgubljenim životinjama sadržan je u odredbama:

Zakona o principima lokalne samouprave („Službene novine Federacije BiH“, broj 49/06 i 51/09). Jedinica lokalne samouprave ima vlastite nadležnosti ustanovljene ustavom i zakonom i ima pravo baviti se svim pitanjima od lokalnog značaja koja nisu isključena iz njene nadležnosti niti dodjeljena u nadležnost neke druge vlasti na osnovu ustava i zakona. U vlastite nadležnosti jedinice lokalne samouprave spadaju preuzimanje mjera za osiguranje higijene i zdravlja kao i zaštita životinja, član 8. stav 3. alineja 31. i 37. Statuta Općine Ilidža-Prečišćen tekst („Službene novine Kantona Sarajevo“ broj 33/10,18/16), član 28. stav 1. tačka 2. i člana 87. kojima je propisano da se odlukom uređuju pitanja iz nadležnosti Općinskog vijeća.

Odredbe u Odluci su u vezi i u skladu sa sljedećim:

Zakon o veterinarstvu BiH („Službeni glasnik BiH“, broj 34/02), Imaoci i čuvari životinja imaju obavezu voditi računa o zdravstvenoj zaštiti životinja i njihovoj dobrobiti i moraju ažurno voditi registar na imanju. Svako je dužan zaštititi zdravlje životinja, kao i zdravlje ljudi, od bolesti i infekcija, koje se prenose među životinjama i ljudima, kao i od posljedica ostatka štetnih materija u prehrambenim proizvodima životinjskog porijekla, član 4. stav 1. i 2.

Zakon o veterinarstvu Federacije BiH („Službene novine FBiH“, broj 46/00): Cijepljenje pasa, vođenje evidencije pasa, te izdavanje službene isprave o tome, vrše veterinarske organizacije. Troškove upisa pasa, obaveznog obilježavanja pasa i izdavanja službenih isprava snosi vlasnik životinje. Sadržaj i oblik registra pasa, te isprave o obveznom upisu i provedenim mjerama, kao i oblik obaveznog obilježja za pse, jedinstveni su za područje Bosne i Hercegovine, član 17.

Zakon o zaštiti i dobrobiti životinja („Službeni glasnik BiH“, broj: 25/09); Sklonište za životinje osniva fizičko ili pravno lice, jedinica lokalne samouprave, općina, grad, kanton ili entitet.

Nadležni upravni organ kantona, grada ili općine izdaje dozvolu za formiranje skloništa za životinje, na osnovu upustva koje propisuje nadležno ministarstvo, a na prijedlog Ureda, te vodi upisnik skloništa za životinje, član 28. stav 4. i 5. Nadležni upravni organ kantona, grada ili općine izdaje dozvolu za formiranje higijenskog servisa za životinje, na osnovu upustva koje propisuje nadležno ministarstvo, a na prijedlog Ureda, član 29. stav 4. Skloništa i higijenski servisi finansiraju se iz budžeta entiteta, kantona, gradova i općina, te drugih vidova finansiranja (donacije, pokloni itd.), član 30.



Eutanazija životinja može se provesti ako: a) se životinja ne može izliječiti, a ostanak u životu će joj uzrokovati nepotrebne bolove i patnju; b) je životinja dostigla visoku starost i otkazuju joj osnovne životne funkcije c) životinja boluje od neizlječive i/ili zarazne bolesti, posebno one koja može ugroziti ljude; d) je životinja opasna po okolinu; e) je životinja u agoniji.

Za slučajeve pod tačkama a) i b), o usmrćenju odlučuje imalac životinje, po preporuci veterinara, za slučajeve pod tačkama c), d) i e), odlučuje veterinar, član 14.

Pravilnik o držanju opasnih životinja („Službeni glasnik BiH“, broj 27/10): „Opasan pas“ je:

- a) Bilo koja jedinka te vrste, porijeklom od bilo koje pasmine koja je:
 - 1) Ničim izazvana, napala čovjeka i nanijela mu tjelesne ozljede ili ga usmrtila;
 - 2) Ničim izazvana napala drugog psa i nanijela mu teške tjelesne ozljede;
 - 3) Uzgajana i/ili dresirana za borbe pasa ili zatečena u organiziranoj borbi s drugim psom;
- b) Pas pasmine terijera tipa *bull* koji ne potiče iz uzgoja iz Člana 8. stav 1. ovoga Pravilnika (*pit bull* terijer) i njegovi križanci, član 2. stav 2.

Pravilnik o identificiranju i vođenju evidencije pasa, mački i pitomih vretica u Bosni i Hercegovini („Službeni Glasnik BiH“ broj: 96/16): Svi psi koji se nalaze na teritoriji Bosne i Hercegovine (u daljem tekstu: BiH) moraju biti identifikovani i evidentirani u skladu s ovim Pravilnikom i uneseni u Bazu podataka. Sve mačke i pitome vretice koje se nalaze na teritoriji BiH mogu se identifikovati i evidentirati na zahtjev vlasnika ili držaoca, u skladu s odredbama ovog Pravilnika, član 3. stav 1.

Zakona o komunalnim djelatnostima („Službene novine kantona Sarajevo“, broj 14/16, 43/16, 10/17, 19/17 i 20/18).

U komunalnu potrošnju spadaju i kafilerijske i slične usluge. Pod obavljanjem kafilerijskih usluga podrazumijevaju se poslovi stalnog i sigurnog uklanjanja životinja, pasa lualica, lešina životinja, određenih nejestivih nusproizvoda klanja, konfiskata i valioničkog otpada sa javnih površina i poslovi eutanazije životinja, član 4. stav 16. Obavljanje kafilerijskih usluga je u nadležnosti Grada i Općina, član 9. stav 2. tačka f).

Zakon o prekršajima protiv javnog reda i mira („Službene novine Kantona Sarajevo“, broj 18/07 i 7/08).

Čija životinja svojim glasanjem narušava javni red i mir, član 8. stav 1. tačka b) i ko bez nadzora ili zaštitnih sredstava drži i vodi opasne životinje koje drugog mogu prestrašiti ili povrijediti ili ko na javnom mjestu zlostavlja životinje, odnosno na drugi način sa njima surovo postupa, član 8. stav 5. tačka k).

II RAZLOZI DONOŠENJA

Iz naprijed navedenog Pravnog osnova se vidi da su uslovi, način držanja i zaštita kućnih ljubimaca regulisani na različitim nivoima vlasti, u više Zakona i Pravilnika.



S tim u vezi ukazala se potreba da se sve odredbe koje se odnose na različite oblasti (uslovi držanja, registracija, izvođenje kućnih ljubimaca, držanje opsnog psa, postupanje sa izgubljenim i napuštenim životinjama, održavanje čistoće, remećanje javnog reda i mira i dr) objedine u jednom propisu u "Odluci o uslovima i načinu držanja kućnih ljubimaca, pasa i domaćih mački, načinu postupanja s napuštenim i izgubljenim životinjama na području općine Ilidža".

U Programu rada Općinskog vijeća za 2018.godini, planirana je izrada Prijedloga Odluke.

Općinski Načelnik je Rješenjem imenovao Komisiju za izradu Prijedloga Odluke o uslovima i načinu držanja kućnih ljubimaca, pasa, domaćih mački, način postupanja s napuštenim i izgubljenim životinjama na području općine Ilidža u sastavu: Enes Čorbo, Sabina Viteškić, Zlatko Pilavac i Nijaz Aljović.

Već nekoliko godina prisutnost pasa, koji se kreću slobodno i obitavaju na gradskim ulicama i javnim površinama je gorući problem u Općini Ilidža, Općinama u Kantonu Sarajevo, tako i u cijeloj BiH.

Ovaj problem traje od donošenja i stupanja na snagu Zakona o zaštiti i dobrobiti životinja kojim je za nadležne institucije za donošenje zabranjena eutanazija osim u zakonom određenim slučajevima.

Podzakonski akti koje donosi Ured za veterinarstvo znatno kasnije su doneseni a neki još uvijek nisu ni donešeni. Tako je Pravilnik o identifikiranju i vođenju evidencije pasa, mačaka i pitomih vretica u Bosni i Hercegovini donešen 2016.godine do kejeg je bilo gotovo nemoguće tretirati problem napuštenih pasa ali i pristupiti formiranju centralnog Registra vlasničkih pasa. Nakon njegovog usvajanja, stvorili su se preduslovi za efikasniji pristup rješavanju ovog aktuelnog problema.

Općina Ilidža je nastojala ubažiti problem zaključivanjem Ugovora o iznajmljivanju objekta skloništa za napuštene i izgubljene životine sa ZZ Gladno polje Ilidža. Međutim, ovaj problem je nemoguće riješiti odvojeno od drugih nivoa Kantona, Federacije i Države BiH.

Veliki broj pasa na ulicama posljedica je i nekontrolisanog razmnožavanja nesteriliziranih pasa, koje godinama nekažnjeno napuštaju neodgovorni vlasnici. Isti puštaju pse da lutaju bez nadzora i u takvim slučajevima te životinje smatraju psima lualicama.

Dakle napuštanje pasa do sada je prolazilo bez ikakvih sankcija.

Nadalje veliki problem je i činjenica da se određeni broj pasa dovodi i ostavlja na području općine Ilidža, drugih Općina Kantona ali i šire.

Donošenje ove Odluke ima za cilj definisanje uslova pod kojima je dozvoljeno držanje kućnih ljubimaca, očuvanje zdravlja ljudi i životinja, smanjenje pasa na ulicama kao i njihovo nekontrolisano kretanje, prvenstveno sa aspekta sigurnosti građana i imovine. Postupanje sa napuštenim, opasnim psima i dr.



III OBRAZLOŽENJE PREDLOŽENIH RJEŠENJA

- član 1. definiše predmet Odluke,
- član 2. definiše pojmove koji se upotrebljavaju u Odluci,
- član 3. definiše dužnosti i zabrane za imaoce kućnih ljubimaca,
- član 4. definiše držanje pasa i mački u stanu, porodičnoj kući i vrtu,
- član 5. definiše održavanje čistoće,
- član 6. definiše obezbjeđivanje nadzora kućnog ljubimca,
- član 7. definiše kretanje u liftu, stubištu i hodniku,
- član 8. definiše remećenje javnog reda i mira,
- član 9. definiše saglasnost suvlasnika za držanje psa u ograđenom prostoru,
- član 10. definiše držanje psa u ograđenom i neograđenom dvorištu,
- član 11. definiše nemogućnost daljnje brige o kućnom ljubimcu,
- član 12. definiše izvođenje na javnu površinu,
- član 13. definiše ograničenja kretanja po javnim površinama,
- član 14. definiše zabrana samostalnog kretanja po javnim površinama,
- član 15. definiše obaveza čišćenja javne površine,
- član 16. definiše kućni ljubimci u sredstvima javnog prijevoza,
- član 17. definiše izuzeci od Odluke,
- član 18. definiše registraciju kućnih ljubimaca,
- član 19. definiše obaveza registracije,
- član 20. definiše dužnosti imaoaca opasnog psa,
- član 21. definiše uslovi izvođenja opasnog psa na javnu površinu,
- član 22. definiše ovlaštenja komunalnog redara,
- član 23. definiše kontrola razmnožavanja,
- član 24. definiše načini provođenja kontrole razmnožavanja,
- član 25. definiše postupanje s izgubljenim životinjama,
- član 26. definiše nalazak napuštene ili izgubljene životinje,
- član 27. definiše obaveza pružanja pomoći životinji,
- član 28. definiše nadzor nad provođenjem Odluke,
- član 29. definiše prava i obaveze ovlaštenih lica,
- član 30. definiše novčane kazne,
- član 31. definiše upoznavanje sa Odlukom,
- član 32. definiše Stupanje na snagu.

IV FINANSIJSKA SREDSTVA

Općina Ilidža obezbjeđuje u Budžetu finansijska sredstva za iznajmljivanje prostora za napuštene i izgubljene životinje te sufinansiranje hrane za pse.

Pri izradi ove Odluke izvršene su konsultacije sa drugim jedinicama lokalne samouprave kako u Kantonu Sarajevo tako i u drugim Kantonima, Sekretarom Općinskog organa uprave i Sekretarom Općinskog vijeća.

Tekst ove Odluke i njeno obrazloženje je u skladu sa Jedinistvenim pravilima za izradu pravnih propisa u institucijama Bosne i Hercegovine („Službeni glasnik Bosne i Hercegovine“, broj 11/05), koja su obavezujuća članom 85. stav 2. Statuta općine Ilidža.



01
18058

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO - OPĆINA ILIDŽA



BOSNIA AND HERZEGOVINA
FEDERATION OF BOSNIA AND HERZEGOVINA
SARAJEVO CANTON - MUNICIPALITY OF ILIDŽA

OPĆINSKI NAČELNIK

MUNICIPALITY MAYOR

Komisija za izradu Prijedloga Odluke

31-07-2019

Ilidža, 31.07.2019.godine

**OPĆINA ILIDŽA
OPĆINSKO VIJEĆE**

SASTAVNI DIO
ODLUKE O
USLOVIMA I
NAČINU DRŽANJA
KUĆNIH
LJUBIMACA

PREDMET: Izvještaj o rezultatima javne rasprave o Nacrtu Odluke o uslovima i načinu držanja kućnih ljubimaca na području Općine Ilidža

Na osnovu Programa rada Općinskog vijeća Ilidža za 2019. godinu usvojenog na 21. redovnoj sjednici održanoj dana 31.12.2018. godine, dostavljamo Vam materijal za avgustovsku sjednicu Općinskog vijeća kao prijedlog:

1. Izvještaj o rezultatima javne rasprave o Nacrtu Odluke o uslovima i načinu držanja kućnih ljubimaca, pasa i domaćih mački, načinu postupanja s napuštenim i izgubljenim životinjama na području Općine Ilidža.

Navedeni materijal Vam dostavljamo u pisanoj formi i CD elektronskoj verziji.

S poštovanjem!

PRILOG: kao u tekstu

DOSTAVLJENO:
1x Naslovu
1x a/a

Predsjednik komisije za izradu Prijedloga Odluke

Enes Corbo





IZVJEŠTAJ

O REZULTATIMA JAVNE RASPRAVE O NACRTU ODLUKE O USLOVIMA I NAČINU
DRŽANJA KUĆNIH LJUBIMACA, PASA I DOMAĆIH MAČKI, NAČINU POSTUPANJA S
NAPUŠTENIM I IZGUBLJENIM ŽIVOTINJAMA NA PODRUČJU OPĆINE ILIDŽA

Ilidža, juli 2019. godine



Zaključkom Općinskog vijeća Ilidža donesenim na 25. redovnoj sjednici, održanoj dana 28.03.2019. godine, utvrđen je Nacrt Odluke o uslovima i načinu držanja kućnih ljubimaca, pasa i domaćih mački, načinu postupanja s napuštenim i izgubljenim životinjama na području općine Ilidža (u daljem tekstu: Nacrt Odluke) i ista se upućuju u Javnu raspravu u trajanju od 30 dana (od 01.04.-30.04.2019. godine).

Nakon provedene Javne rasprave dostavljene su primjedbe, mišljenja i sugestije na navedeni Nacrt Odluke od strane subjekata i svih ostalih zainteresovanih koji su učestvovali u Javnoj raspravi kako slijedi:

Vijećnik Mirza Alijagić daje sugestiju na propisane novčane kazne koje koje su prilično visoke, nadzor u provođenju odluke, te regulisanje držanja kućnih ljubumaca u urbanim sredinama kao i u stanovima i kućama

Stav predlagača:

Sugestija vijećnika je usvojena vezano za smanjenje novčanih kazni, dok ostale dvije sugestije nisu usvojene iz razloga jer je predlagač cijenio razlike držanja kućnih ljubimaca u stanu i kući, odnosno dvorištu i različito definisao broj pasa i mačaka koji se mogu držati u stanu i kući odnosno dvorištu.

Vijećnik Azra Jahić, Mirsad Madeško i Muhamed Omerović su dali prijedlog da se u Budžetu općine Ilidža planiraju novčana sredstva za medijsku kampanju o značaju provođenja i edukacije građana o navedenoj Odluci

Stav predlagača:

Prijedlog vijećnika je djelimično usvojen iz razloga što je članom 18. stav 2. ove Odluke definisan način provođenja kampanje na registraciji kućnih ljubimaca i gdje se dodatno mogu putem medija, letaka i sl. upoznati građani koji imaju kućne ljubimce

Odluka će nakon donošenja biti objavljena u Službenim novinama Kantona Sarajevo, WEB-stranici Općine Ilidža, Bilten Općine Ilidža, facebook stanovnicima mjesnih zajednica i svim nadležnim za sprovođenje ove Odluke.

Vijećnik Ammar Uzunović daje primjedbu na član 4. navedene Odluke da se propiše ukoliko se radi o jedinkama autohtone bosanske pasmine i da se može držati bar tri jedinske ovih pasmina

Stav predlagača:

Primjedba vijećnika je usvojena i član 4. stav(2) je izmjenjen i glasi: "u porodičnoj kući, vrtu ili sličnom zemljištu dozvoljeno je držanje dva psa najviše tri ukoli se radi o autohtonoj vrsti psa i tri mačke".

Vijećnik Tarik Stambolić je dao primjedbu da ima građana koji tradicionalno imaju više pasa u avliji, uredno održavaju imaju boksove 4, 5,6,i to rade 30-40 godina i da se provjere uslovi i mogućnosti držanja pasa

Stav predlagača:

Ova Odluka je tačno definisala broj i uslove načina držanja kućnih ljubimaca, a ako se primjedba odnosi na one koji se bave uzgojem ova se Odluka ne odnosi na njih. Oni se registruju kao uzgajivači pasa kod nadležnog organa.

V PU – Policijska uprava Sarajevo daje primjedbe na navedenu Odluku kako slijedi:

Naziv Odluke može biti sporan jer se u nazivu odluke navode kućni ljubimci, dok je u tekstu fokus na psima i dijelom domaćim mačkama. Pojam kućni ljubimci definisan drugačije od zakonske definicije.

Odluka bi trebala detaljnije propisati koje vrste životinja se mogu držati kao radne, odnosno kao životinje za pomoć.



Treba potpunije definisati opasne životinje, da je to životinja od koje postoji rizik da prema svojim prirodnim urođenim karakteristikama ispoljava sklonost za napad na čovjeka kojim mu može nanjeti tjelesne povrede ili ga usmrtniti, kao ugroziti zdravlje i sigurnost ljudi.

Kad su u pitanju ograničenja kretanja po javnim površinama, potrebno je dodati površinu na kojima je zabranjeno kretanje kućnih ljubimaca i trebale bi biti označene posebnim znakom.

Razlog zbog čega bi trebalo proširiti definiciju, kućnih ljubimaca je taj, što postoji mogućnost da u blizini aerodroma građanin drži golubove te da ih iz dvorišta trenira te može ugroziti letjelice koje koristi aerodrom.

Razmotriti mogućnost propisivanja efikasnijih mehanizama kontrole držanja kućnih ljubimaca, kako građani na svojim balkonima ili prostorijama u kojima stanuju ne bi formirali leglo. Propisati odredbe koje se odnose na uzgoj.

Stav predlagača:

Primjedba vezana za naziv Odluke nije prihvaćena iz razloga što se osnovne odredbe uslovi način držanja odnose na kućne ljubimce ali ima i onih odredbi koje definiše držanje pasa i mačaka jer su oni najzastupljeniji kućni ljubimci, a oni se izvode i kreću se po javnim površinama, zajedničkim prostorijama, mogu onečistiti prostor, ometati javni red i mir. Također ima veliki broj napuštenih pasa koji predstavljaju veliki problem.

Primjedba da definicija kućnog ljubimca treba biti preciznija je prihvaćena te je pojam kućni ljubimac definisan kao u Zakonu o dobrobiti životinja, član 2. stav (a) izmjenjen i glasi:

“Kućni ljubimci su: psi, domaće mačke, domaće ptice, mali glodari, terarijske, akvarijske i druge životinje koje se uzgajaju i drže za društvo, rekreaciju, zaštitu ili pomoć čovjeku

Primjedba u vezi definicije opasne životinje nije prihvaćena jer je definicija opasne životinje je prepisana iz Pravilnika o držanju opasnih životinja.

Primjedba da se trebaju označiti javne površine na kojima nije dozvoljeno kretanje pasa je prihvaćena pa je član 13. izmjenjen i glasi:

„(1) Kućnim ljubimcima zabranjeno je kretanje na dječijim igralištima, parkovima, cvjetnjacima, neograđenim sporskim terenima, dvorištima škola i vrtića te na drugim mjestima gdje postoji opasnost ugrožavanja zdravstveno-higijenske sigurnosti i zdravlja ljudi bez dopuštenja vlasnika i dozvole korisnika prostora

(2) Upravitelji javnih površina i ustanova dužni su istaknuti znak zabrane pristupa kućnim ljubimcima.“

Primjedba da se uzgoj golubova i držanje definiše ovom Odlukom nije prihvaćen jer uzgoj ni jednog kućnog ljubimca nije predmet ove Odluke. Držanje golubova divljih ptica mora biti regulisano zakonom ili Pravilnikom na višem nivou.

Član Komisije za statut i propise Ante Mrnjavac daje primjedbe na sljedeće članove navedene Odluke :

Član 18. Odluke suprotan članu 9.-13. Pravilnika o uzgoju i upisu pasa u rodovnu knjigu KS u BiH

Član 24. Odluke suprotan članu 7. i 8. Pravilnika o uzgoju i upisu pasa u rodovnu knjigu KS u BiH

Član 25. Odluke suprotno članu 2. Pravilnika o uzgoju i upisu pasa u rodovnu knjigu KS u BiH.

Član 28. Odluke suprotno Zakonu o lovstvu član 22. i vršenje sanitarnog odstrjela

Član 31. Kako će izvršiti nadzor ovlašteno lice i tko mu može dati odobrenje za ulazak u privatni posjed

Član 32 Odluke svim kaznama ukinuti po jednu nulu jer su ovo represivne a ne vaspitne mjera, Odluka nije Zakon već općinski akt i treba se pozvati na Zakon po kojem javna uprava - može izricati i određivati visinu kazni

Član 33. Dati mogućnost imaocima kućnih ljubimaca da u roku jedne godine usklade držanje ljubimaca sa Odlukom

Stav predlagača:

Primjedbe na članove 18., 24., 28. i 32. nisu usvojene jer su navedene odredbe Odluke u skladu Zakonom o dobrobiti životinja /član 6.,7.,8./koji ima veću pravnu snagu od Pravilnika. Ukoliko je



Pravilnik o uzgoju i upisu pasa u rodovnu knjigu KS u BiH u suprotnosti sa Zakonom, Pravilnik treba biti usklađen.

Član 25. je brisan iz Odluke jer se odnosi na uzgoj pasa, obzirom da to nije predmet ove Odluke. Primjedba na član 28 Odluke koji definiše Obavezu pružanja pomoći životinji ne vidimo da je u suprotnosti sa članom 22. Zakona o lovstvu koji kaže:

„Vlasnici ne smiju puštati pse da se bez kontrole kreću po lovištu.

Korisnik lovišta dužan je uklanjati pse i mačke koji se kreću bez kontrole po lovištu na udaljenosti većoj od 300 m od naseljenih objekata.“

Član 28. Odluke ne isključuje odgovornost vlasnika ukoliko puste da se psi kreću po lovištu jer je to propisano Zakonom kao i prava korisnika lovišta. Odluka ne derogira zakonski propis, jer se i ne odnosi na lovišta.

Općine mogu propisivati prekršaje i prekršajne sankcije na osnovu člana 12. stav (1) Zakona o prekršajima Federacije Bosne i Hercegovine“ Službene novine F BiH“ broj 63/14 koji kaže:

„Prekršaji i prekršajne sankcije mogu biti propisani zakonima Bosne i Hercegovine, Federacije, Kantona ili drugim propisima Vijeća ministara Bosne i Hercegovine, Vlade Federacije, vlada kantona i odlukama gradskog ili općinskog vijeća.“

Primjedba na član 31. nije usvojena jer je definisana članom 36. i 37. Zakona o dobrobiti životinja.

Primjedba koja se odnosi na visinu novčane kazne je djelimično usvojena. Naime, visina novčanih kazni je usklađena sa propisanim novčanim kaznama u Zakonu o dobrobiti životinja, Odluci o prekršajima o javnom redu i miru i Zakonu o prekršajima Federacije BiH. U Odluci su kazne propisane u zakonom datom rasponu minimalna – maksimalna.. Prihvatili smo primjedbu vijećnika i novčane kazne umanjili ali ne ispod zakonskog minimuma.

Primjedba na član 33. koja definiše Upoznavanje sa Odlukom se usvaja, te član 31. je izmjenjen i glasi: “Svi imaoči kućnih ljubimaca na području Općine Ilidža biće upoznati sa odredbama ove Odluke putem web-stranice Općine Ilidža, putem mjesnih zajednica (oglasnih tabli, članova Savjeta i Sekretara mjesnih zajednica) i putem predstavnika etažnih vlasnika u zgradama kolektivnog stanovanja.

Imaoči kućnih ljubimaca, dužni su njihovo držanje uskladiti sa odredbama ove Odluke u roku od jedne godine od dana stupanja na snagu ove Odluke”.

Stručna služba općinskog vijeća daje primjedbe na sljedeće članove navedene Odluke:

„U članu 2. tačka (I) Odluke sugerišemo da se pojam javne površine u smislu ove Odluke preformuliše, a sve iz razloga praktične primjene ove Odluke. Ovaj pojam javne površine je važan iz razloga što je ovom Odlukom regulisano izvođenje kućnih ljubimaca na javnu površinu kao i određena ograničenja. U ovoj tački sugerišemo da iz pojma javne površine brišu riječi „neizgrađeno građevinsko zemljište koje je izuzeto“.

U članu 5. Odluke, u zagradi iza riječi „hodnici“ dodati“stepeništa“.

Član 12. Odluke iza riječi „javne površine“ dodati riječi“ iz člana 2. tačka (I) ove Odluke.“

U članu 13. Odluke riječi „koji se kreću na povodcu dodati riječ „stepeništa“.

U članu 13. Odluke dodati stav (2) koji glasi:

„Na ulazu u prostore iz stava (1) ovog člana mora biti vidljivo istaknuto upozorenje „ZABRANJENO ZA PSE, MAČKE I KUĆNE LJUBIMCE“

U poglavlju IV – USLOVI IZVOĐENJA KUĆNIH LJUBIMACA NA JAVNE POVRŠINE „sugerišemo da se propiše da svi koji izvode kućne ljubimce na javne površine (imalac životinje ili kućnog ljubimca, kao i sva druga lica) moraju sa sobom imati propisanu službenu ispravu – dokument kojim dokazuje da su kućni ljubimci uredno registrovani, čipovani protiv bjesnila i tretirani protiv parazita u nadležnoj veterinarskoj organizaciji u skladu sa ovom odlukom i pozitivnim zakonskim propisima. Ovakva odredba u ovoj odluci u ovom poglavlju je neophodna jer omogućava sankcionisanje u slučaju kršenja odredbi ove odluke .



Pored navedenog sugerišemo da se ovom poglavlju Odluke jednim članom bude propisano da će Općina u narednom periodu izgraditi poseban prostor za kućne ljubimce na području općine kao i da će se pitanje upravljanja ovim prostorom i njegovim funkcionisanjem regulisati Pravilnikom koji će donijeti općinski načelnik na prijedlog Službe za razvoj, komunalne poslove i puteve.“

Stav predlagača:

Primjedba koja se odnosi na član 2. tačka (l) se usvaja te član 2. tačka (l) izmjenjena i glasi.

(l) javne površine su: pješačke saobraćajnice i trotoari, javne zelene površine (parkovi, travnjaci, zelenilo uz saobraćajnice) i sporsko-rekreativne površine (izletišta, šetališta i sl.)

Primjedba na član 5. Odluke se usvaja, te član 5. izmjenjen i glasi:

„ Imalac kućnih ljubimaca dužan je brinuti o čistoći zajedničkih prostorija u kojima se kreću kućni ljubimci, te odmah očistiti ili oprati površinu, ukoliko je njegov ljubimac na bilo koji način onečistio (hodnici, stepeništa,terase,liftovi, balkoni, podrumski i tavanski prostori).

Primjedba na član 12. Odluke se usvaja , te član 12. izmjenjen i glasi:

„ (1) Psi se smiju izvoditi na javnu površinu iz člana 2. tačka (l) ove odluke , na povodcu i pod nadzorom imaoaca.

(2) Imalac kućnog ljubimca dužan je tokom njegovog izvođenja na javnu površinu sa sobom imati propisanu službenu ispravu kao dokaz o njegovoj registraciji i vakcinaciji.“

Primjedbe na član 13. Odluke se usvaja i član 13. izmjenjen i glasi:

(1) Kućnim ljubimcima zabranjeno je kretanje na dječijim igralištima, parkovima, cvjetnjacima, neograđenim sportskim terenima, dvorištima škola i vrtića, te na drugim mjestima gdje postoji opasnost ugrožavanja zdravstveno-higijenske sigurnosti i zdravlja ljudi bez dopuštenja vlasnika i dozvole korisnika prostora.

(2) Upravitelji javnih površina i ustanova dužni su istaknuti znak zabrane pristupa kućnim ljubimcima.

Predlagač je član 29. Odluke brisao, obzirom da je korištenje životinja u komercijalne svrhe već regulisano članom 3. ove Odluke.

Savjeti mjesnih zajednica Sokolović Kolonija, Lužani i Hrasnica I osim podrške u izradi i isticanju potrebe za donošenje Odluke nisu imali primjedbi na Nacrt Odluke.

KOMISIJA ZA IZRADU
PRIJEDLOGA ODLUKE

